

ዮሃንሲ ገፊዳ ኮይሮ ኪታ ጊዶ ቆፋ

ዮሃንሲ ኮይሮ ዮዲዳ ኪታዛን ናምዑ አይፌ ዮቲ ዴቴስ። ሄይቲካ ሄ ኪታዛ ናባቢዛይታስ ሰሳራኔ ሰሳ ና ዮሱስ ኪርስቶሳራ ኢሲፌቴስ ዴዓና ማላ ኢስታ ሚንሴሳናሲኔ ሄሳ ሄ ኢሲፌቴሳ ጳይሲዛ ዎርዶ ቲሚርቴፌ ኢስቲ ናጌታና ማላ። ሃይሲ ኪታይ ገፊቲዛ ዎዴ ሄ አላሜዛ ቦላ ዳሮ ዎልቃማ ዎርዶ ቲሚርቴይ ዴስ። ሄ ቲሚርቴዚካ ኢሲ ኢሲ አማኒዛ አሳታ አማኖፔ ካሬ ኬሲዴስ። ሄ ዎርዶ አስታማሬቲ ታማርሲዛ ኢታ ቲሚርቴይ 1. “ዎሲ አያና አላሜ ገላላ ሜጲዴስ። 2. ሃይሳ ሃ አላሜዛን ዲዛ አይፌን ቤቲዛ ሚሺ ኡባኔ ኑ አሳቴሲ ዎሲ ሜጲቤና። ሄሳ ጊሽ ሄ ሜዴቴሳቲ ወሪካ ኢታ ገላ። 3. ሃይሲ አይፌን ቤቲዛ አላሜዚኔ ኑ አሳቴሳይ ኑ አያና ቆሃናሲኔ ቱኒሳናስ ዳንዳዮና።” ሃይሳ ጉሲ “ኮይሮ ሰሳፌ ዩዳ ዮሱሳስ አሳ አሳቴሳ ዴና። ቃሴካ ናምግንሶራ ኢሳዴይ ሃራ አሳ ቦላ ናጋራ አሲኮኔ ኢዚ ሃራ አስ ኢጊኮ ሄሳዴ አሶዚ ኢዛ አያና ቆሃናሲኔ ቱኒሳናስ ዳንዳዮና” ጉሳ። ሄይቲ ሄ አስታማሬቲ “አቶቴሳ ጉሲ ሃይሳ አላሜዛ ዱሳስ ቆፖንታ አጎ ኮሼስ” ጊ ታማርሴቴስ። ሄሳራካ ጋሲዲ “ሎዎ አሶን ጊዲን ዎይኮ አሴ ሲቆይ ሙሌካ ኮሼና” ጊ ታማርሴቴስ።

ሄሳ ጊሽ ዮሃንሲ ባ ኪታን ሄሳሶ ዎርዶ ቲሚርቴይ ቱሙ አማኖ ቲሚርቴፌ ካሬ ጊዲዳይሳ ታማርሴስ። ሄሳ ሄ ቲሚርቴዛ ኢዎን ዮሱስ ኪርስቶሲ ኩሜሳራ አሴኮ፤ ዮሱሳን አማኒዛይቲኔ ዎሴ ሲቁዛይቲ ወሪካ ባ ጋርሳን ኢሶይ ኢሳራ ሲቁታናስ ቤሴስ ጊዲ ኡሪሲዴስ። ቃሴካ ዮሱሲ ቱሙ አሳ አሾ ማይዲዳይሳኔ ዮሌቲዳይሳ ካዲዛዴይ ሰሳፌ ዮሌቲቤና። (4:2-3) ጎዳ ሰሳፌ ዮሌቶንታዴይ ቃሴ ሰሳፔ ጊዲዳይ ሲቃናወ ዳንዳዮና። ሰሳፌ ዮሌቲዳይዴ ኡባ ዎዴ ናጋራን ዴዓናስ ዳንዳዮና። (3:10)

- ሃ ማገፋይ አይኪዳ ኩሜሳ ቆፋ
- ጌሎሶ 1:1-4
- ፖዶኔ ጳማ 1:5-2:29
- ዎሳ ናይታኔ ገላዔ ናይታ 3:1-24
- ቱማኔ ዎርዶ 4:1-6
- ቱማ ሲቆ 4:7-21
- ዎኒዛ አማኖ 5:1-21

ዴቦ ቃላ

1 ዴቦ ቃላ ጊሽ ኮይሮፔ ዲዛይሳ ኑኒ ኑ ሃይሳን ሲዩዳይሳኒ ኑ አይፌራ ቤዩዳይሳ ሎዔሲ ዩሊዳይሳ፣ ኑ ኩሼራ አይኪ ቤዩዳይሳ ጊሽ ሃሳዮስ። * 2 ዴቦይካ ቆንጨዴስ፤ ኑካ ኑ አይፌራ ቤዩዲ ማርካቶስ። ኢዛስ ኢዛ አዋ አቻን ዲዛይሳኒ ኑስካ ቆንጨዳ ሜርና ዴቦ ጊሽ ኑ ኢንቴስ ዮቶስ። * 3 ኢንቴስካ ኑናራ ኢሲፌቴሲ ዳና ማላ ኑኒ ቤዩዳይሳኒ ሲዩዳይሳ ኢንቴስ ዮቶስ። ኑ ኢሲፌቴሳይካ አዋራኔ ኢዛ ና ዩሱስ ኪርስቶሳራ። 4 ኑ ኡፋይሳይ ኩሜስ ጊዳና ማላ ኑ ሃይሳ ኢንቴስ ዓፎስ። *

ፖዎን ሲሜሬቴስ

5 ኑ ኢዛፔ ሲይዲ ኢንቴስ ዮቲዛ ኪታይ “ዖሲ ፖዎ፤ ኢዛ አቻን ሙሌካ ጳማይ ዴና” ጊዛይሳ። 6 “ኑ ጳማን ሲሜሬቴሼ ኢዛራ ኑስ ኢሲፌቴሲ ዴስ” ጊኮ ዎርዶቶስ አቲን ቱማን ዶኮ። 7 ጊዶ አቲን ኢዚ ፖዎን ዲዛ ማላ ኑካ ፖዎን ሲሜሬቴኮ ኑ ጋርሳን ኑስ ኢሲፌቴሲ ዴስ፤ ኢዛ ና ዩሱስ ኪርስቶሳ ሱሲ ኑና ናጋራ ኡባፌ ጊሼስ። 8 ኑ ኑናን ናጋራይ ባዋ ጊኮ ኑርካ ኑና ባሌሶስ፤ ቱማይካ ኑናን ዴና። 9 ኑኒ ኑ ናጋራ ፓዊኮ ኢዚ ኑ ናጋራ አቶ ጋናሲኔ ኑ ቆሆፔ ኑና ዉርሲ ጊሻናስ ኢዚ አማኔቲዳዴኔ ዊሎ። 10 ኑ ናጋራ አሲቤኮ ጊኮ ኢዛ ኑ ዎርዳንቻ ኬሶሲኔ ኢዛ ቃላይካ ኑናን ዴና።

2

1 ታ ናይቶ! ታ ኢንቴስ ሃይሳ ዓፊዛይ ኢንቴ ናጋራ አሶንታ ማላሳ። ጊዶ አቲን አኒካ ናጋራ አሲኮ አዋ አቻን ኑስ ዓባቃይ ዴስ። ኢዚካ ዊሎዛ ዩሱስ ኪርስቶሳ።

2 ኢዚ ኑ ናጋራይ አቶ ጌቴታና ማላ አጌ ጊጊሲዛዴ፤ ሄሲካ ኑና ዓላላ ጊዶንታ ኩሜሳ አላሜ አሳሳራ አቲን ኑስ ዓላ ጊዴና። 3 ኑ ኢዛ አዛዞታ ፖሊኮ ኑ ኢዛ ኤሪዳይሳ ሄሳን አማኔቶስ። 4 “ታ ኢዛ ኤራይስ” ጊሼ ኢዛ አዛዞ ፖሎንታዴ ጊዲኮ ሄሳዴይ ዎርዶ አሳ አቲን ቱማይ ኢዛዴን ዴና። 5 ቃሴ አኒካ ኢዛ ቃላ ናጊኮ ቱሙ ዶሳ ሲቆይ ኢዛዴን ፖሌቲዴስ። ኑኒ ኢዛን ዲዛይሳ ኤሪዛይ ሄሳና። 6 ታ ኢዛን ዳይስ ጊዛ አሲ አኒካ ዩሱሲ ሲሜሬቴዳ ማላ ሲሜሬታናስ ቤሴስ።

አራሳ አዛዞ

* 1:1 ዮሃ 1:1 * 1:2 ዮሃ 1:14 * 1:4 ኑ ኡፋይሳይ ኢሲ ኢሲ ቢርሼቻታን ኢንቴ ኡፋይሳይ ጌቴቲዴስ።

7 ታ ሲቆቶ! ታ ኢንቴስ ዓፈዛይሲ ካሴ ኢንቴስ ዲዛሮ ኢንቴስን ጋምዒዳ አዛዞቶ አቲን ሃራ ኦራሳ አዛዞ ጊዴና፤ ጋምዒዳ አዛዞያ ካሴ ኢንቴ ሲዩዳ ቃላ። 8 ሃራ ባጋራ ታ ኢንቴስ ዓፈዛይ ኪርስቶሳ አቻኒኔ ኢንቴ አቻን ቱሙ ጊዲዳ ኦራሳ አዛዞ፤ ጋሶይካ ዱማይ አዲን ቱሙ ፖፖይ ፖፖ ቦላ ዴስ።

9 ፖፖን ዳይሲ ጊሼ ባ ኢሻ ኢዲዛዴይ ሃዒካ ዱማን ዴስ። 10 ባ ኢሻ ሲቂዛዴይ ፖፖን ዴስ፤ ሄሳዴስ ዱጴ ጊዲዛ ሚሺ ዴና። 11 ጊዶ አቲን ባ ኢሻ ኢዲዛዴይ ጊዲኮ ዱማ ጊዶን ዴስ፤ ዱማን ሲሜሬቴስ፤ ዱማይ ኢዛ ቆቂሲዳ ጊሽ ኢዚ አዋ ቢዛኮኔ ባ ቢዛሶ ኤሬና።

12 ታ ናይቶ! ኢንቴ ናጋራይ ዩሱስ ኪርስቶሳፕ ዴንዲዳይሳን አቶ ጌቴቲዳ ጊሽ ታ ኢንቴስ ዓፋይስ። 13 አዋቶ! ካሴ ኮይሮፕ ዲዛይሳ ኢዛ ኢንቴ ኤሪዛ ጊሽ ታ ኢንቴስ ዓፋይስ፤ ናቴሳቶ! ኢንቴ ኢታ ጊዲዳ ዓላፔ ዶኒዳ ጊሽ ታ ኢንቴስ ዓፋይስ።

14 ናቴሳ ናይቶ! ኢንቴ አዋ ኤሪዳ ጊሽ ታ ኢንቴስ ዓፋይስ። አዋቶ! ኮይሮፕ ዲዛይሳ ኢዛ ኢንቴ ኤሪዳ ጊሽ ታ ኢንቴስ ዓፋይስ። ናቴሳቶ! ኢንቴ ሚኖታ ጊዲዳ ጊሺኔ ዶሳ ቃላይ ኢንቴናን ዲዛ ጊሽ ኢንቴ ኢታ ጊዲዳ ዓላፔ ዶኒዳ ጊሽ ታ ኢንቴስ ዓፋይስ።

አላሜ ዶሶፐቲ

15 ሃይሳ አላሜዛ ዎይኮ ሃ አላሜዛን ዲዛ አይ ሚሽካ ዶሶፐቲ። አኒካ ሃ አላሜዛ ዶሲኮ አዋ ሲቆይ ኢዛዴ አቻን ዴና። 16 ጋሶይካ ሃ አላሜዛን ዲዛይ ዉሪ አሾ አሞቴስ፤ አይፊስ ሎዶኔ ዱሳን ጩቁቴስ፤ ሃይቲ አላሜፕ አቲን ዶሳ አዋፕ ዩዛይታ ጊዴቴና። 17 አላሜይኔ አላሜን ዲዛ አሞቴሲ አዳና ሺን ዶሳ ሽኔ ፖሊዛይቲ ጊዲኮ ሜርናስ ዳና።

ኪርስቶሳራ ኤቁቲዛይታፕ ናጌቴስ

18 ናይቶ! ሃይሲ ዉርሴሳ ሳቴ። ኢንቴ ሲዩዳ ማላ ኪርስቶሳራ ኤቁቲዛይይ ያና። ሃዒካ ኪርስቶሳራ ኤቁቲዛ ዳሮቲ ዩዳ። ሃይሲ ዉርሴሳ ሳቴ ጊዲዳይሳ ኑ ሃይሳን ኤርስ። 19 ኢስቲ ኑ ጊዶፊ ኪዚዳ። ጊዶ አቲን ኢስቲ ካሴካ ኑ ባጋ ጊዴቴና። ኢስቲ ኑ ባጋ ጊዲዳኮ ኑናራ ሚኒ ኤቃናኮሺን፤ ጊዶ አቲን ኢስቲ ዉሪ ኑ ባጋ ጊዶንታይሲ ኤሬታና ማላ ኑፕ ሻኩቲዳ

20 ኢንቴና ቃሴ ኪርስቶሲ ሂሎ አያናን ቲዩዴስ፤ ሄሳ ጊሽ ኢንቴ ዉሪካ ቱማ ኤሬታ። 21 ታ ኢንቴስ ዓፈዛይ ኢንቴ ቱማ ኤርናታ ጊሽ ጊዴና፤ ጊዶ አቲን ኢንቴ ቱማ ኤሪዛ ጊሺኔ ቱማ ጋርሳፊ አይኮ ዎርዶይካ ቤቶንታይሳ ኢንቴ ኤሪዛ ጊሻሳ።

22 ዩሱሳ ኢዚ ኪርስቶሳ ጊዴና ጊ ካዲዛዴፊ ሃራ ዎርዳንቻይ አኔ? ሄሳዴይ አዋኔ ናዛ ካዲዛ ኪርስቶሳራ ኤቁቲዛዴ። 23 ናዛ

ካዲዛዴስ አናሲካ አዋይ ዴና፤ ናዛ ኤኪዛዴስ ኡባስ ኢዛስ አዋይካ ዴስ።

²⁴ ኢንቴ ኮይሮ ሲዬዳ ቃላያ ኢንቴናን ዱ፤ ኢንቴ ኮይሮ ሲዬዳራ ኢንቴናን ዲኮ ኢንቴካ ናዛኔ አዋን ዳና። ²⁵ ሜርና ዴዎይ ኢዚ ኑስ ኢማና ጊዳ ሂዶታ ቃላ።

²⁶ ኢንቴና ባሌሲዛ አሳታ ጊሽ ሃይሳ ኢንቴስ ባፋዲስ። ²⁷ ኢንቴ ቃሴ ኢዛፔ ኤኪዳ ሂሎ አያናይ ኢንቴናን ዲዛ ጊሽ ሃራይ ኦኒካ ኢንቴና ታማርሳናስ ቤሴና። ኢዚ ኢንቴና ታማርሳናይሲ ቴሙ ኦቲን ዎርዶ ጊዴና፤ ሄሳ ጊሽ ሂሎ አያናይ ኢንቴና ታማርሲዳ ማላ ኪርስቶሳን ዴዲቴ። ²⁸ ሄሳ ጊሽ ናይቶ! ኢዚ ቆንጨዛ ዎዴ ኑስ ባላቴሲ ዳና ማላ ኢዚ ዩዛ ዎዴካ ኑ ኢዛ ሲንሳን ዩሌቶንታ ማላ ኢንቴ ኢዛን ዴዲቴ። ²⁹ ኢዚ ሂሎ ጊዲዳይሳ ኢንቴ ኤሪዛ ጊዲኮ ሂሎ ኦሲዛይ ዉሪ ኢዛፔ ዩሌቲዳይሳ ኢንቴ ኤሬታ።

3

ዎሳ ናይታ

¹ ኑኒ ዎሳ ናይታ ጌቲታና ማላ አዋይ ዳርሲ ሲቂዳ ኢዛ ሲቆይ ኑስ አይ ማላ ጊታኮኔ አኔ ቤዩቴ! ቴሙካ ኑ ኢዛ ናይታ። አላሜይ ኑና ኤሮንታ አጊዳይ ኢዛ ኤሮንታ አጊዳ ጊሻሳ። ² ታ ኢሻቶ! ኑኒ ሃዲ ዎሳ ናይታ፤ ቡሮ ኑ አይ ሃናናኮኔ ሃዲ ቆንጨቤና፤ ኪርስቶሲ ቆንጨዛ ዎዴ ኑ ኢዛ ቤያናኔ ኑካ ኢዛ ሚሳታናይሳ ኑ ኤሮስ። ³ ሃይሳ ኢዛን ሂዶታ ኦሲዛይ ዉሪ ኢዚ ጊሽ ጊዲዳ ማላ ባና ጊሼስ።

⁴ ናጋራ ኦሲዛይ ዉሪካ ማካላ ኦሴስ፤ ናጋራይካ ማካላ። ⁵ ኢዚ ናጋራ ዳይሳናስ ቆንጨዳይሳ ኢንቴ ኤሬታ። ኢዛን ናጋራይ ባዋ።

* ⁶ ኢዛን ዲዛ አሲ ኦኒካ ናጋራ ኦሴና። ናጋራ ኦሲዛይይ ኦኒካ ጊዲኮ ኢዛ ቤይቤና ዎይኮ ኤሪቤና።

⁷ ታ ናይቶ! ኢንቴና ኦኒካ ባሌሶንታ ማላ ናጌቲቴ። ኢዚ ሂሎ ጊዲዳ ማላ ሂሎ ኦሲዛይይካ ሂሎ። ⁸ ናጋራ ኦሲዛይ ባላዔፔ፤ ጋሶይካ ባላዔይ ኮይሮፔካ ናጋራ ኦሲዛዴ። ዎሳ ናይ ቆንጨዳይካ ባላዔ አሶ ላላናሳ።

⁹ ዎሳፌ ዩሌቲዳይ ዉሪ ናጋራ ኦሴና። ዎሳ ዜሬሲ ኢዛን ዲዛ ጊሺኔ ኢዚ ዎሳፌ ዩሌቲዳ ጊሽ ናጋራ ኦሳና ዳንዳዩና። ¹⁰ ዎሳ ናይቲኔ ባላዔ ናይቲ ሻኬቲ ኤሬቴዛይ ሄሳና። ሂሎ ኦሶንታይኔ ባ ኢሻ ሲቆንታይ ዉሪ ዎሳፌ ጊዴና።

ኢንቴ ኢሶይ ኢሳራ ሲቄቲቴ

* 3:5 ዮሃ 1:29

11 ኢንቴ ኮይሮ ሲደዳራ “ኑ ኑ ጋርሳን ሲቁታና ቤሴስ” ጌቲቲዳ ኪታዖ ሃኖ። * 12 ኢታ ባጋ ጊዲዲ ባ ኢሻ ዎዲዳ ሃዮሌ ማላ ጊዶፒቴ። ኢዚ አዛስ ዎዲዴ? ጋሶይካ ኢዛ አሶይ ኢታ፤ ኢሻ አሶይ ሎዖ ጊዲዳ ጊሻሳ። *

13 ታ ኢሻቶ! ኢንቴና አላሜ አሳይ ኢዲኮ ማላሌቶፍቴ። 14 ኑኒ ኑ ኢሻታ ዶሲዛ ጊሽ ሃይቆፔ ጌዴ ዴዎን ፒኒዳይሳ ኑ ኤሮስ። ሲቆይ ባይንዳይዴ ወሪ ሃይቆ ጊዶን ዴስ። * 15 ባ ኢሻ ኢዲዛዴይ ሼምፖ ዎዲዳ አሳ። ሼምፖ ዎዲዳዴስ ሜርና ዴዎይ ባይንዳይሳ ኢንቴ ኤሬታ። 16 ዩሱስ ኪርስቶሲ ባ ሼምፖ ኑ ጊሽ አሲ ኢሚዳ ጊሽ ሲቆይ አዛኮኔ ኑ ሄሳን ኤሮስ። ኑካ ኑ ሼምፖ ኑ ኢሻታ ጊሽ አሲ ኢማኖስ ኑስ ቤሴስ። 17 ሚሺ ዲዛዴይ አኒካ ባ ኢሻይ ዋዮቲሺን ቤዩዲ ኢዛስ ሚሼቶንታ አጊኮ ዶሳ ሲቆይ ኢዛን ዋኒ ዳኔ? 18 ታ ናይቶ! ቱሙ አሶንፔ አቲን ሮ ዱናኒኔ ቃላን ሃላላ ሲቁቴስ አኔ አጎስ።

19 ኑኒ ቱሙ ባጋ ጊዲዳይሳ ሃይሳን ኤሮሲኔ ኑ ዎዝናካ ኢዛ ሲንሳን ሼምፒሶስ። 20 ሄሲካ ኑ ዎዝናይ ኑ ቦላ ፒርዲዛ ሚሻን ኡባን ዶሲ ኑ ዎዝና ቆፋፔ ቦላራ ጊዲዳ ጊሽ ኢዚ ወርሲ ኤሬስ። 21 ታ ኢሻቶ! ኑ ዎዝናይ ኑ ቦላ ፒርዶንታ አጊኮ ኑስ ዶሳ ሲንሳን ባቢዛ ሚሺ ዴና። 22 ኑ አዛዞታ ናጊዛ ጊሺኔ ኢዛ ኡፋይሲዛዝ አሲዛ ጊሽ ኑ ኢዛ ዎሲዛዝ ወርሲ ኑ ኢዛፔ ኤካና። 23 ኢዛ አዛዞይካ ኑ ኢዛ ናዛ ዩሱስ ኪርስቶሳ አማናሲኔ ኢዚ ኑና አዛዚዳ ማላ ኑኒ ኑ ጊዶን ዶሴታና ማላሳ። * 24 ኢዛ አዛዞታ ናጊዛይቲ ወሪ ኢዛን ዴቴስ፤ ኢዚካ ኢስታን ዴስ። ኢዚ ኑናን ዲዛይሳ ኑ ኢዚ ኑስ ኢሚዳ አያናን ኤሮስ።

4

አያና ፓጪ ጻሊቴ

1 ታ ኢሻቶ! አያና ወርሲ አማኖፒቴ፤ ጊዶ አቲን አያናቲ ዶሳፊኮኔ ፓጪ ቤይቴ። ጋሶይካ ዳሮ ዎርዶ ናቤቲ ቢታ ቦላ ላሌቲዳ። 2 ኢንቴ ዶሳ አያና ኤራና አጌይ “ዩሱስ ኪርስቶሲ አሳ አሾ ማይዲዲ ዩዴስ” ጊዛ አያናይ ወሪ ዶሳፊኮ! 3 “ዩሱስ ኪርስቶሲ አሳ አሾ ማይዲዲ ዩዴስ” ጎንታ አያናይ ዶሳፊ ጊዴና፤ ካሴ ኢዚ ዶና ጊሺን ኢንቴ ሲዩዳ ኪርስቶሳራ ኤቁቲዛ አያናይ ሄሳ፤ ሃሲካ ኢዚ አላሜ ቦላ ዴስ።

* 3:11 ዮሃ 13:34 * 3:12 ሜዴ 4:8 * 3:14 ዮሃ 5:24 * 3:23 ዮሃ 13:34፤ 15:12፤17

4 ታ ናይቶ! ኢንቴ ያሳይታ። ኢንቴ ኢስታ ያንደታ፤ ጋሶይካ ኢንቴናን ዲዛይ አላሜን ዲዛይሳፌ አዴስ። 5 ኢስቲ አላሜ ባጋኮ፤ ሄሳ ጊሽ ኢስቲ ሃሳዩዛይ ወሪ አላሜ፤ ኪዚዛይሳ፤ አላሜ አሳይ ኢስቲ ጊዛይሳ ሲዮስ። 6 ኑ ቃሴ ያሳ ባጋ፤ ያሴ ኤሪዛይ ኑ ጊዛዝ ሲያና ሺን ያሳ ባጋ ጊዶንታዴይ ጊዲኮ ኑ ጊዛዝ ሲዮና። ቱማ አያናኔ ዎርዶ አያና ኑ ሻኪ ኤሪዛይ ሃይሳና።

ያሳ ሲቆ

7 ታ ኢሻቶ! ሲቆይ ያሳፌ ጊዲዳ ጊሽ ኑኒ አኔ ሲቆቶስ። አሳ ሲቂዛ አሲ ወሪ ያሳፌ ዮሌቲዳዴኔ ያሴ ኤሪዛይ። 8 አስ ሲቆንታ አሲ ያሴ ኤሬና። አዛስ ጊኮ ያሲ ሲቆ። 9 ያሳይ ኑ ጊዶን ባ ሲቆ ቆንጨሲዳይ ኑ ኢዛ ባጋራ ዴዎ ዴማና ማላ ባ ና ኢሲኔዛ ሃ ዱጊ ሃ አላሜዛን ዮዲዳይሳና። 10 ኑኒ ያሴ ሲቂቤይኮ ሺን ኢዚ ኑና ሲቂዴስ። ኑ ናጋራ ዳይሳና ማላ ባ ናዛ ዮዲዴስ። ሲቆ ጉሲካ ሄሳ።

11 ታ ኢሻቶ! ያሲ ኑና ሃይሳሶ ሲቂኮ ኑካ ኑ ጊዶን ሲቂታናስ ቤሴስ። 12 ያሴ ቤዩዳ አሲ አኒካ ባዎ። ኑኒ ኑ ጊዶን ሲቂቂዛ ጊዲኮ ያሲ ኑናን ዳና። ኢዛ ሲቆይካ ኑናን ፖሌታና። *

13 ኢዚ ኑስ ባ አያና ኢሚዳ ጊሽ ኑ ኢዛን ዲዛይሳኔ ኢዚካ ኑናን ዲዛይሳ ኑ ሄሳን ኤሮስ። 14 አዎይ ባ ናዛ ሃይሳ ሃ አላሜ አሳ አሻናስ ዮዲዳይሳ ኑ ቤይዶሲኔ ኢዛ ጊሽ ማርካቶስ። 15 ዮሱሲ ያሳ ና ጊዲዳይሳ አማኒዲ ማርካቲዛ ኡባን ያሲ ዴሲኔ፤ ኢዛዴይካ ያሳን ዴስ። 16 ሄሳ ጊሽ ያሲ ኑና ሲቂዛ ሲቆ ኑ ኤሮስ። ኑ ኢዛ ሲቆን አማኔቶስ። ያሲ ሲቆ። ሲቆን ዲዛይይ ያሳን ዴስ። ያሲካ ሄሳዴን ዴስ። 17 ኑኒ ሃይሳ ቢታ ቦላ ዴዲዛይ ኪርስቶሲ ዴዲዳ ማላ ጊዲዳ ጊሽ ኑስ ፐርዳ ጋላስ ባቦይ ዴና። ሄሳንካ ሲቆይ ኑናን ኩሜስ ጊዴስ። 18 ሲቆ ጊዶን ባቦይ ባዎ፤ ቱሙ ሲቆይ ጊዲኮ ባቦ ኪሲ ዎራ ዮጌስ። ባቦይ ቂፃቴራ ኢሲፌ አይኬቲ ዴስ። ባቢዛዴ ሲቆይ ኩሜስ ጊዴና።

19 ኢዚ ካሴቲዲ ኑና ሲቂዳ ጊሽ ኑካ ኢዛ ሲቆስ። 20 አኒካ ያሴ ሲቃይስ ጊሽ ባ ኢሻ ኢዲኮ ሄሳይይ ዎርዶ። ባ አይፌራ ቤዩዛ ባ ኢሻ ሲቆንታ አሲ ባ አይፌን ቤዮንታ ያሳ ሲቃናስ ዳንዳዮና። 21 “ያሴ ሲቂዛ አሲ ወሪካ ባ ኢሻ ሲቃናስ ቤሴስ” ጊዛ ሃ አዛዞዛ ኢዚ ኑስ ኢሚዴስ።

5

ያሳ ናን አማና

* 4:12 ዮሃ 1:18

1 ዮሱሲ ኢዚ ኪርስቶስ ጊዲዳይሳ አማኒዛይ ወሪ ያሳፌ ዮሌቲዴስ። አዋ ደሲዛይ ወሪ ናዛካ ኢዛሶ ደሴስ። 2 ኑኒ ያሴ ደሲቱኔ ኢዛ አዛዞ ናጊኮ ኑ ያሳ ናይታ ሲቁዛይሳ ሄሳን ኤሮስ። 3 ያሳ ደሶ ጉሲ ኢዛ አዛዞ ናጎ፤ ኢዛ አዛዞቲ ዴዎ ጊዴቲና። 4 ጋሶይካ ያሳፌ ዮሌቲዳይ ወሪ አላሜ ያኔስ። አላሜ ያኒዛይካ ኑ አማኖ። 5 ዮሱሲ ያሳ ና ጊዲዳይሳ አማኒዛዴፌ አቲን አላሜ ያኒዛይ ሃራይ ኦኔ?

6 ሃሳኒኔ ሱሳን ዩዳይ ሃይሳ ዮሱስ ኪርስቶስ። ኢዚ ሃሳኒኔ ሱሳን ዩዴስ አቲን ሃሳን ሃላ ዩቤና። ሄሳካ ኢዛ ጊሽ ማርካቲዛይ አያና። ሄ አያናይ ቱሙ አያና። 7 ሄሳ ጊሽ ኢዛስ ሄሹ ማርካቲ ዴቲስ። 8 ሄይቲካ አያና፤ ሃሴኔ ሱሳ፤ ሄሻታ ቃላይካ ኢሲኖ። 9 ኑ አሳ ማርካቲስ አማኒኮ ያሳ ማርካቲላ ሄሳፌ አዴስ። ሄሲካ ኢዚ ባ ናዛ ጊሽ ኢሚዳ ያሳ ማርካቲላ። 10 ያሳ ናን አማኒዛዴ ኡባ ዎዘናን ኢዛ ጊሽ ማርካይ ዴስ። ያሴ አማኖንታይ ወሪካ ያሲ ባ ናዛ ጊሽ ኢሚዳ ማርካቲላ አማኖንታ ጊሽ ኢዛ ዎርዶሴስ።

11 ኢዛ ማርካቲላይካ ያሲ ሜርና ዴዎ ኑስ ኢሚዴስ፤ ሄ ዴዎይካ ኢዛ ናዛን ዴስ ጊዛይሳ። * 12 ናዚ ዲዛዴስ ዴዎይ ዴስ፤ ያሳ ናይ ባይንዳዴስ ዴዎይ ባዋ።

ኩሻ ቆፋ

13 ኢንቴስ ያሳ ናን አማኒዛይታስ ሜርና ዴዎይ ዲዛይሳ ኢንቴ ኤራና ማላ ታ ሃይሳ ኢንቴስ ሃፋይስ። 14 ኑ ያሳ ሲንስ ሺቃናስ ኑስ ዲዛ ሃላቴላ ሃይሳ። ኑ አይ ሚሺካ ኢዛ ሸኔ ማላ ዎሲኮ ኢዚ ኑ ዎሳ ሲያና። 15 ኑ ኢዛ ዎሲዛ ሚሽ ኢዚ ወርሲ ሲዩዛይሳ ኑ ኤሪዛ ጊዲኮ ኑ ዎሲዳ ሚሻ ወርሲ ኤካናይሳ ኑ ኤሮስ።

16 አኒካ ባ ኢሻይ ባና ሃይቆስ ጋሶንታ ናጋራ አላሺን ቤዩኮ ኢዛስ ዎሶ። ያሲካ ሃይቆስ ጋሶንታ ናጋራ አላዳይታስ ዴዎ ኢሚና። ሃይቆስ ጋላዛ ናጋራይካ ዴስ። ሃይቆስ ጋላዛ ናጋራ ጊሽ ዎሶ ጊኬ። 17 ማካላይ ወሪካ ናጋራ፤ ሃይቆስ ጋሶንታ ናጋራይካ ዴስ።

18 ያሳፌ ዮሌቲዳይ ወሪ ናጋራ አሴና፤ ጋሶይካ ያሳ ናይ ኢዛ ናጊዛይሳኔ ኢታይ ኢዛ ቦቾንታይሳ ኑ ኤሮስ።

19 ኑኒ ያሳፌ ጊዲዳይሳኔ አላሜይ ኩሜስ ኢታ አሳ ኩሼን ዲዛይሳ ኑ ኤሮስ።

20 ያሳ ናይ ዩዳይሳ ቱሙ ጊዲዳ ኢዛ ኑ ኤራና ማላ አኬካ ኢዚ ኑስ ኢሚዳይሳ ኑ ኤሮስ። ኑካ ቱሙ ጊዲዳ ኢዛ ናዛ ዮሱስ ኪርስቶስን ዶስ፤ ኢዚካ ቱሙ ያሳን ሜርና ዴዎ።

21 ናይቶ! ኢንቴናቴላ ኤቃታፔ ናጊቴ።

* 5:11 ዮሃ 3:36

አራሳ ጫቆ ማገፋ ጋሞላ

New Testament in Gamo (ET:gmv:Gamo)

copyright © 2011 Wycliffe Bible Translators, Inc.

Language: Gamo

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Gamo

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25
